

## COTEENU PABLO NAAJIONEE TIMOTEOCUARA

**Pablo saruhuatasacari Timoteo**

**1** <sup>1</sup>Janiyari Pablóni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijonara cua jiyatequiaari. Paari Jesucristoocua tiuuiacani, nojuaja jataniniuria pajaniya juhua nojuaja pa quiniurajuhuj. <sup>2</sup>Timoteonaa, janiyari nio naajiya quiarani. Quiaari juhua quianura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuj, nojori cuaara cumaquiiria quiajaniya. Nojori cuaara quiocua taraajeerajuhuj. Nojori cuaara pueyaracaanu quioojia cajitiirajuhuj.

**Pablo sequesacari sesa niishitiojonuujuaa cuaara sanaajasaaria**

<sup>3</sup>Janiya jaara Macedonia jiyajiniara quiaquiaarini, janiyacuajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. <sup>4</sup>Janiyari quia sequequiaarijuhuj, nojori quia sequenura, maja nojori niishiriojonura najuhuana nojori supuetanaa pohuatanusanojinia. Janiyari quia sequequiaarijuhuj, maja nojori niishiriojonura nojori supuetanaa sesacajinia, cuno, najuhuana tucayocua-ra naajionuutasanoni. Pueya

niishiriojonuusacari pueyaracaanu cuno najuhuana casaajinia, nojoriiri cunoocua juayonuujutaquiaa saaja. Saniniuujia, nojori cuaara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

<sup>5</sup>Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitioojuaa nojori quiniuria. Nojori cuaara shitimia panitioojuaa quiriara, juhua jeequesano nojori jiuujia quishacari. Seetanujanaa Pueyasoocua nojori tiuushacari, nojori cuaara panitioora maja noojia macuhajenuta sesa nojori miishanojiniji. <sup>6</sup>Noojiaqueya cuno pojorijinijinioori tari tarinitiacanu tojiniu nio maninia niishitiojosano. Nojoriiri cushitiquianu na pocojonuucua, na nacojonuucua najuhuana tama nojori niishishanojinijiaaja. <sup>7</sup>Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujiushacari pueya, pueya tojiniuria najuhuana capa nojori niishitiojosano.

<sup>8</sup>Paacujaari niishiyani, Pueyaso rootasano Moisésni, cunoori maniniacua-ja, paa jaara niishirini casaara naa Pueyaso rootaquiaari pa supuetanaani. <sup>9</sup>Paacujaari niishiyani, Moisés Rootasanoori maja na pueretenu maninia miijiaca pueya cutara. Pueyasoori maja

na rootasano na niishitiniu quiquiaari maninia miijiacara. Na niishitiquiaari cutaraari na tojtiaashijiacara, tama na panishanojuuaa miijiacara, Pueyaso soojecarajuhua, sesa miijiacarani. Moisés Rootasanoori Pueyaso rerequetejacara, Pueyaso casaa rerequetejacarajuhua, noo pojorirajuhua, tama na que tacartaja monutej, na nuncanio, pueya puecoojuacarajuhua. <sup>10</sup>Moisés Rootasanoori na camishoo maajipohua numuetucunuujacara, maajishurihuara, na numuetucunuujacarani. Moisés Rootasanoori pueya nohuasenuujacara juhua casami na niquitijosocoriquiano tamasa seya; sapojonuujacarajuhua; na sapojonuta na sequesano maatejacarani, nocua na tiuushanura; puetunu noo pojorirajanaano, maninia niishitijosano tojiyashijiacatej. <sup>11</sup>Cuno maninia niishitijosanoni, cunocuaaari cua pohuatasano Jesucristo rupaajiniji, pueya jatanura Pueyaso pueyara. Pueyasoori jiyanoohua maninia, cuno rupaa pohuata nara na jiyatenuucua janiya.

**Pablo shuquiritiasacari Pueyaso, na rupaa pohuatanara na jiyatenuucua nojuaja**

<sup>12</sup>Pa Jiyaniijia Jesucristoori cucua tiuquuaari nera cua poonijionura maninia. Cunora, na rupaa pohuatanara cua jiyatequiaariri. Nojuajaari cua cumaquiquiaa. Cunora, janiyari na sequequiaani, “paacarasho”. <sup>13</sup>Tariucacaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijuhua, nocua tiuuijaca cua miitiasacari. Janiyari jiyanoohua na paracaajia quiquiaarijuhua. Naajaa, Jesucristoori saaja cucua taraajequiaarini cua niishiyaquiniucua casaa cua miiriquiaani, nocua tiuyashijia cua quishacarijia. <sup>14</sup>Naa cucua na taraajenuucuatej, nojuajaari seetanujua-

naa cua jiyanooquiaari. Na jiyanooshacari janiya, nojuajaari cua jataniquiaari nocua tiuuijaca cua quiniuria, panijia cua quiniurajuhua.

<sup>15</sup>Timoteonaa, noori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jyanootiniuria sesa miijia. Janiyacuaaari tojetaarucuanaa cuno sesa miijia pueyajinijinio na jiyanooshanoni. <sup>16</sup>Janiyari naa jyanoo-shaaquiaarini puetunu pueyajanaa niishiniuria taa jyanohua jyanootiote Jesucristoni, pueyaracaanu na rejeretanucua cua juaaniu. Naa Jesucristo jyanooniucucuaa janiya, sesa miijia cua quishacarijiatej, Jesucristoocua tiuuijacarano cuaara niishiiria, nojoriiri na naata jiyanooshanujuhua Jesucristoocua nojori tiuushacari. Naacujitij, nojoricua pueyaracaanu quijiacara jiyatesaarejuhua. <sup>17</sup>Naa jyanootio pa Jiyaniijia quiniucuatej, nojuaja pa timitiare pueyaracaanu. Nojuajaari Jiyaniijajuhuanajaj. Nojuajaari Pueyasocua, shaajeyashijia, namijia niquiyaquishoo. ¡Jiyanoohua maniniaari pa Jiyaniijia! ¡Naa seetanujuanari!

<sup>18</sup>Timoteonaa, quiaacuaaari niishiya taa Pueyaso cumaquiquiaari quiajaniyacuajani, nera quia poonijionura. Cunoori quiquiaari Pueyaso pueya jiitianaa jaara caminiujuquiaari Pueyaso sequenu panishano quia, nera poonijiona quia quiniuria. Naacujitij quianunaa, cua tojiri. Pueyaso cumaaca quia jiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. <sup>19</sup>Naa quia quiri Pueyaso rupaa quia pohuatasacari, seetanujuanaa na rupaacua tiuuijaca quia quishacari, seetanujuanaa na rupaa tojijia quia quishacarijuhua. Naa quijia quia quiritij, quioojia mariqui quia macuhua-

jareeri quiaa jaara sesa miiriquia. Noojiaqueya pueyari tari Pueyasooqua tiuuniu tarinitiacanu nojori ruuretanuu-cua Pueyaso Sohuanu numootesacari nojori jiuujiajinia, sesa nojori miishacari. <sup>20</sup>Naa miitiuquianuuri Himeneo, Alejandronio. Janiyari cunora Pueyaso secorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacujitij, nojori cuaara niishiiria maja socua sacuaraatia nojori rimiaaquenura Pueyasooquara.

### Secojonuunura niishitiojosano

**2** <sup>1</sup>Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacuara nia secojoriquiajuhuaj. Naajuhuj, Pueyaso nia sequeriquia “paacarasho”, pueyaracaanu maninia na miiniucua. <sup>2</sup>Jiya jiyaniijianucuaacuara nia secojonuuriquiajuhuaj, puetunu pueya camarucuaacuara juhuaj. Nojoriicua nia secojonuuriquia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatajuhuaj. <sup>3</sup>Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. <sup>4</sup>Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijiaca nojori quiniuriajuhuaj. <sup>5</sup>Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quiya Pueyaso Jiyanootijia pueya. Nojuajaari Jesucristocuaja. <sup>6</sup>Puetunu pueyajanaa quishacari saniitosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacujitij, na Que Pueyasoori na naata jiyanooniupajaniya saniniujia. Quiarijiacuajaari Pueyaso panishacari Neyanujiniji

pohuatasaanura pueya niquiara, nojori jiyanooshaanura. <sup>7</sup>Nio rupaa cua pohuatanurajuhuj, Pueyasojunaari cua jiyatequiaari Jesucristojiniji pohuatana cua quiniuria. Cua jiyaramiquiquiaariiri taucuaa cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaj. Nio cua sequesanoori seetanujuanaa. Majaari cua sapojonu.

<sup>8</sup>Cunora, cua tojiri. Janiyari paniyani puetunu tiqiyocuajanaa pueya secojonuunura Pueyaso. Jiyocuacaanu nojori shiitosacari nojori juaashiquia nojori secojonura, nojori jiuujia cuaara quiriia jeequesano sesa nojori miishanojiniji. Naajuhuj, cuaara quiaquiriia najiquitishano, maja sesa niishiriojonutajuhuj. <sup>9</sup>Naajuhuj, janiyani paniyani maajipohua cuaara cushiyaquiriia puera maniniuquiya toqueya, narta maajipohua na shocotanura. Cuaara cushiyaquiriia cararaatia niquishano toqueyajuhuj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiriia nojoriiri seetanujuanaa shanohua niquishano, nojori muecaca jeeacasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushitianuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. <sup>10</sup>Nojori cuaara maniniucuaaariquia cutara, maninia miijiaca maajipohua nojori quiniucua. Nojori cuaara quiriia juhua noo maajipohuaja, canapuetucuaja tama nojori cuaqueyajaaja jiyatecanu Pueyasora na quiniuria seetanujuanaani. <sup>11</sup>Pueyaso rupaa niishitiojosacari, maajipohua cuaara tojitiariquia sanaa, maja Pueyaso rupaa pohuatanaa na

rejetenuta. <sup>12</sup>Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaanura narta Pueyaso pueya jiitiana na quiniuria. Nojori cuaara sanaa tojitiariquia cutara, narta Pueyaso pueya rerejosacari. <sup>13</sup>Quia niishiri Timoteonaa, casaara naa cua sequeyani. Pueyasocuaajaari coteenu Adán shipiniquiaari. Na nuhuaji Adán niquiora-no Eva shipiniquiaariiri. <sup>14</sup>Quia niishirijiuhuj, Soconurano\* jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuaajitij, na sapojosaanuucua, Evaari Pueyaso tojiyashijiara quiquiaari. <sup>15</sup>Naaratej, maajipohua cuaara maninia canashitijioora necohua. Cuaara panijiaa quiriirajuhuj. Cuaara maninia mijiiaa quiriirajuhuj, maninia niishiriojojuaca nojori quishacari. Naa maajipohua miishacaritij, Pueyasoori nojori jiitianutaniya maninia, Jesucristoocua tiujijiaa nojori quishacari.

**Pueyaso pueya jiitianatucua taamueca pueyano quiriqiani**

**3** <sup>1</sup>Nio sequesanoori seetanujuanaa: cante Pueyaso pueya jiitianara quiniu paniyani, nojuajaari maninia poonijiosano miiniucua jiaatiaa. <sup>2</sup>Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niquijioteyashijia, maninia niishiriojojuajuhuj, pueya rerequeteyaquishoonio. Cuaara quiiria maninia pueyano, rucoojuaca pueya tiuquinitiaja na tiajinia. Cuaara quiiria Pueyaso rupaa niishitiojua maninia. <sup>3</sup>Naajuhuj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya riuhuane-

yashijia, pueya juaashacari nojuaja. Cuaara quiiria shiniquiajuhuaj. Cuaara cumaneecaacua jiaatiaashijia quiriirajuhuj. <sup>4</sup>Naajuhuj, nojuaja cuaara na tiajinia quiniaa jiitiaja quiriia maninia. Cuaara necohua niishitiojojua quiriia maninijuhuj, tojitiajaca nojori quiniuria, pueya rerequeteyashijiacanio. <sup>5</sup>Naacuaajitij, pueyano jaara maninia casaa necohua niishitiojiyashijia quiriquia, ¿maatucua taa maninia jiitariquia Pueyaso pueya maanuni? <sup>6</sup>Naajuhuj, Pueyaso pueya maanu jiitariquiano cuaara quiiria seetanujua-naa Pueyaso tojjia pueyano cutara. Cuaara quiyaquiiria shusha Pueyasocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás\* miiquiaricuaani. Pueyaso panishano seru Satanás quishacarijia, nojuacuajaari taanuusaquaiiri Pueyaso shuriucuaaji, na jiyaniishacari nojuaja na naata na Jiyaniijia Pueyaso shocotanu. <sup>7</sup>Naajuhuj, Pueyaso pueya maanu jiitariquiano cuaara quiiria maninia mijiia pueyano, Jesuucua tiuyashijiaca pueya mariqui na sesacareeri maninia miyashijia na quishacari. Nojuaja jaara naa rerequetesano quiritij, nojuajaari juhua Sesaaca norijiosano quiniutianiya. Naacuaajitij, pueya tojiyaquishano quiniutianiyari.

**Narta Pueyaso pueya naacunaatucua taamueca pueya quiriqiani**

<sup>8</sup>Naajuhuj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano mijiiaa. Cuaara quiyaquiiria puera mashaca jereeca ratunuucua jiitinio. Cuaara quiiria cumaneecaacua jiaatiaashijia, jiyasohuaja na nohuasejonura, na

sapojonuta na masenuranio. <sup>9</sup>Naajuhuj, nojori cuaara seetanujuanaa Pueyaso rupaa tojijiaca quiriia, teyanoocua tiuujiaca pa quiyacuajani. Naacuajitij, nojori jaara naa mijiaca quiriritij, ¿nojori-tiucua casaacua cararosaariquiani?

<sup>10</sup>Cunora, pueya cuaara senota jiyateya-quishaaria Pueyaso pueya naacunaa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojtiajaca. Nojori jaara maninia mijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacunaa nojori quiniuria.

<sup>11</sup>Naajuhuj, Pueyaso pueya naacunaa niquiocohua cuaara quiriia tojishano maajipohua, maja rimiaacatujuri. Cuaara quiriia niishiriojuuaca, na sequesano mijiaca pueyaracaanunio. <sup>12</sup>Cante Pueyaso pueya naacunaani, nojori cuaara jiitiaara saa niquiriyatu niquiocuaja. Cuaara quiriia necohua niishitiojojua maninia casaa, na tojtiajaca necohua quiniuria. Naajuhuj, cuaara quiriia maninia jiitiaja na tiajinia quiniaa pueya. <sup>13</sup>Naacuajitij, Pueyaso pueya naacunaa jaara maninia poonijioquiaa na naacuscari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jijanohua Jesucristoocua tiuujiacara jatanutianiya, na puereyaquiniutia nojori poonijionura pa Jiyaniijiaara.

**Jesucristojiniji Pueyaso niishitishano pueyani, paari nocua tiuujiacani**

<sup>14-15</sup>Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitij, janiya jaara tarishirini, janiyari paniani juhuacarijia quia niishiniuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucuaajaari pueyaracaanu rishijia Pueyaso quiquio. Na saquiriojosano

pueya nojori quiniuucua, nojoriiri na rupaa jiitianaacujaja, nocuaji tacunaajaa-riuhuj. <sup>16</sup>Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucujajanaa sesa miyashijia. Naajuhuj, Pueyaso seyacuajaari Jesu niquiquiaari na samitiasacariuhua. Nojuajiniijiri pohuatasaquiaari Judiocuaca niquiara, taucuaca niquiarajuhuj. Pueyapueeri nocua tiuuquiaari. Na Queeri na tacaniquiaariuhua Jiyaniijiajanaa na quiniuria.

**Pueyaso Rupaa carteriquiano pueyajiniji pohuatasano**

**4** <sup>1</sup>Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojinii, tamaatia niishitiojosano nojori tojiniiuucua. Nojoriiri seetanujuanaa sapojosaanutaniya naa nojori tojiniiuucua samaruhua niishishano. <sup>2</sup>Nojoriiri sapojonuujuaca pueya tojtiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuacaari tariucua sesa miiniuucua jiitiquiono. Majaari tari na niishituniu caririquiniu. <sup>3</sup>Cuno pojoriiri pueya niishitiojojua maja na caminiuria. Niishitiojonuuquiaajaariuhuj maja pueya miaquenura noojiaqueya miaquesanojuhuaj, teyano Pueyaso shipiniquiaari Jesuocua tiuujiacaracuajani, cante seetanu rupajaanaa niishijiacacuajani. Cuno miaquesanocuaajaari pa timitiasocoriquiano, Pueyaso pa sequenura, “paacarasho”. <sup>4</sup>Puetunu Pueyaso shipinishano casaaja-

naari maninia. Puetunu miaquesano casaajanaa cuaara puereyaquishaaria miaquenu, paa jaara coteenu nocuara Pueyaso sequereni, “paacarasho”.<sup>5</sup>Pueyaso rupaacua tiuujiaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

**Jesucristora poonijiona pueyanotucua taamueca pueyano quiriquiani**

<sup>6</sup>Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuj, pueyaracaanu tama quia cuaqueyajaaja quia cumaquiriquia Jesucristojini pa niishishano rupaata, tama Jesucristojuaaja rootasano-tanio, taa quia tojiquiaacuajanoj. Quiaa jaara naa miiija quirritij, quiaari maninia poonijiona quiniutianiya Jesucristora.

<sup>7</sup>Majaari najuhuana tariucuaaanu supuetanaa pohuatanuusano tojjia quia quiniu, najuhuana tama pueya niishishanojuajaanio. Majaari cuno tojiniuucua quia cojenu najuhuanaj. Jiyanhua quia jiaatiare cutara, saaja Pueyaso tojjia quia quiniuria. Naa miiniu quia saniniujiuri jiyanhua, seetanujanaa Pueyaso panijia quia quiniuria. <sup>8</sup>Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniuujia, socua jiyanhua maninia cutaraari Pueyaso panijia pa quiniuria seetanujanaa. Cunoori jiyanhua maninia, mijiria pa quishacariria, Pueyaso shuriucua pa quishacaririjuhuj. <sup>9</sup>Nio cua sequesanoori seetanujanaa. Puetunu pueyajanaa cuaara na tojiiria. <sup>10</sup>Cunora, pueya jaara pa miitariquia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa

tarinitianu. Paacuaajaari niishiyani, paari pueyaracaanu rishijia Pueyasooocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

<sup>11</sup>Nio cua sequesano quiajaniya quia niishitiojore pueya. Nojori quia nacasuriquia jiyanhua, na tojitianura quiajaniya.

<sup>12</sup>Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhuj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuj, seetanujanaa panijia quia quiri, Pueyaso rupaacua tiuujiacuhuj. Majaari rucujeejoju quia quiniu. Naa maninia miiija quia quiri, pueya jiaatianura quiocua.

<sup>13</sup>Naacuajitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanhua, Pueyaso tojitiajaca nojori quiniuhua seetanujanaa. Seetanujanaa nojori quia niishitiojoriquia maninia. <sup>14</sup>Pueyasocuaajaari na cumaaca niqutioquiaari quiajaniya. Pueyaso Sohanucuaajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyaracaanu. Majaari najuhuana na jiitianu.

<sup>15</sup>Puetunu niya cua rootasanojuanaa quiajaniyani, cuno tojjia quia quiriquia. Naa quia quirritij, puetunu pueyajanaa niquiniuria taa seetanujanaa socua maninia Pueyaso tojjia quia quiyareeni. <sup>16</sup>Naacuajitij, tama quioojiaaja quia cojuare. Naajuhuj, tama quia cuaqueyajaaja quia cojuare seetanu rupaajanaa

quia niishitiojonura pueya. Majaari quia tarinitianu miiniu cua sequesano quiajaniya. Naacujitij, quiaa jaara naa maninia mijia quiri, quiaari tama quia cuaqueyajaaja jiyateya maninia Pueyaso pueyanora. Quia tojitiajaca pueyari Pueyaso pueyara quiniutianiyajuhuj.

**Paatucua taa jiitiariquia parta  
Pueyaso pueyani**

**5** <sup>1</sup>Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacariajuhuaj, juhua quia tapueyocuaca. <sup>2</sup>Naajuhuj, motajoori quia nacasure juhua quia nucua. Niyacoori quia nacasure juhua quia rimiatuhujuhuj, maja nojoriicua quia jiaatianuta.

<sup>3</sup>Mashiquiopue jaara tojetaarucujanaa niquiohuaju quiri, jinianuhujunio, Pueyaso pueya cuaara nojori naacuura.

<sup>4</sup>Saniniuujia, mashiquio jaara niquiohuaraca quiriquia, jinianuhuaraca soj, cuno pojori cuaara coteenu tama na nucujaja cojuatunu niishiiria, na jijiuhuj. Naacujitij, necohua cuaara na queya cojuaara, taa na queya cojuaquiaari nojoricuaani, naatuoori nojori quishacari. Pueyasoori naa na queyaca taraajecata timitiaja. <sup>5</sup>Noo mashiquio, cante seetanujanaa jiyopueejuni, nojuajaari saaja Pueyasooocua tiuquuaa. Majaari na tarinitianu secojonu juuca, niucuanio. <sup>6</sup>Noo mashiquio saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarijia. <sup>7</sup>Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. <sup>8</sup>Canapue na queecua, na nucuaacua taraajeyaquiiani, tama na tiajinia quijia pueyacuajuhuj, naa mijiacatej, nojoriiri Pueyaso Rupaa

tojiyashijiacara jiyaterohua tari tama nojori cuaqueyajaaja. Naacujitij, nojoriiri socua tojetaarucujanaa sesa, Pueyasooocua tiyauquijia pueyajiniji.

<sup>9</sup>Mashiquio jaara Pueyaso pueya jiitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. <sup>10</sup>Cuno mashiquio cuaara niishishano maaji quiiria, maninia mijia na quiniuucua. Cuaara quiirajuhuj, cante maninia canashitijioquiaari necohuani. Cuaara rucojuacaacua taraajeya quiirajuhuj, na tiajinia na maquiojojua. Cuaara maninia mijia quiirajuhuj, narta Pueyaso pueya niohuaca jeequejojua. Cuaara taraatia miishano pueyacuara taraajeya quiirajuhuj, nojori cumanjia-najuhuj. Cuaara puetunu maninia na miiniujianaa tarinitiaquijia quiirajuhuj.

<sup>11</sup>Saniniuujia, noo mashiquio, teyanote juhuanuojaja maja na shocotejonu sesenta marijiani, nojori cuaara jiyateya-quishaaria Pueyaso pueya jiitianaa naacunaara. Nojori na naata Cristo samiritianu, niyacaaniuucua nojori jiaatiasacari. <sup>12</sup>Naacujitij, nojori camishacariuhua, nojoriiri tari sesa miiri, nojori jatanuucua nojori sequesano saaja Jesucristora na poonijionura. <sup>13</sup>Naajuhuj, niyacoo naata mashiquio nojori quishacarijia, nojoriiri saaja rucuanenon maniniucujaja, na tiuquijionura puetunu tiacojuanaa. Naa tama na poonijosanojuaja na jiitiaaquishacaritij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasaraj. Naajuhuj, sacuaaratia neteyocoyari juhua paateca, na taajetenura pueya, na caminiujiusha-

cari jiyasohuaja niishishano casaa.

<sup>14</sup>Naaratej, janiyari cunora paniyani niyacoojori naata mashiquioque cuaara camiyora neyacaara. Cuaara muetuuraju-huaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaa-ja na quiniu quiniutianiya pa paraa rimiaaquenura Pueyaso pueyacuara.

<sup>15</sup>Noojiaqueya niyacoojori naata mashiquioqueeri Pueyaso tojinuu tarinitiacanu tari, Satanás tojjijaca nojori quiniuria saniniuuja.

<sup>16</sup>Pa Jiyaniijiaacua tiuujiaca maajipo-huajiniijinio jaara tama na pueyajiniijiniojuuaja jiitiare mashiquio-pue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquioque, canapuate tojetaarucujanaa jiyopueejuni.

<sup>17</sup>Pueyaso pueya jiitianaa, noo pojori canapuate maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuj, nojori cuaara nareja niquitio-saaria, na panishano nojori jiitianura. Pueyaso pueya maanu jiitianaajiniijinio, canapuate Pueyaso rupaa pohuatanaacua-jani, Pueyaso rupaa niishitiojonaanio, nojori cutara cuaara socua queraatia niquitiosaaria, maninia poonijosano nojori miiniuucua. <sup>18</sup>Tariucuaaanu Pueyaso Rupaajinia naajiotasanoori naa niishitiojiyajuhaaj, naa na sequesacari miriqui:

“Majaari quia juunu rupaa mishiquio-nu na miaqueyaquiniuria quia casaa, quia rapijjotesacari quia natau, na jocuanura na sucujiniji”.

Naa sequeyajaarihuaj:

“Poonijjotesano pueyano cuaara niquitiosaaria na poonijionu sami”.

<sup>19</sup>Pueyano jaara saquiriojotariquia Pueyaso pueya maanu jiitianaacuara, majaari na tojinuu, jaara nocuara cojitiaa-quiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanu-juanaa. <sup>20</sup>Naacuajitij, Pueyaso pueya maanu jiitianaajiniijinio jaara sesa miiriquia, Pueyaso pueya maanu niquiara quia nacasurenoj, puetunu narta Pueyaso pueyajanaa puerenura, maja sesa nojori miiniurijahuaj. <sup>21</sup>Timoteonaa, janiyari nio quia sequeya Pueyaso niquiarani, Jesucristo niquiarajuhuj, na saquiriojo-sano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijionu sacuraatia. <sup>22</sup>Naajuhuj, majaari senota quia juashishoo quia quia nianu quia niishishoo pueyanoocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenojoni, maja sesa miiijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiuutianutianiya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

<sup>23</sup>Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia quiniuucua, secaja vino\* quia raturiquia-juhuaj quia jiniacuma na jeecanura.

<sup>24</sup>Noojiaqueya pueya, sesa nojori miishanoori maatia niishishanocua, Pueyaso saniitionu juuca quiaquishaca-

rijia. Tamasacara saniniuujia, sesa nojori miishanoori maja na niishishaanu quiniutianiya juhuanajuaja, Pueyaso cuaara nojori nujuatejore na tacojijiaati-  
 25Naajaarihuaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

**6** <sup>1</sup>Parta Pueyaso pueyajinijinio, canapuate poonijotesano pueyani, nojori cuaara na camarucua tojtiajaca quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiojosano-  
 2Poonijotesano pueyano camarnu jaara Pueyaso pueyano quiriquia, juhua na serujuhuaj, na seru cuaara na tojijia quiiria. Cuaara na rerequeteja quiyaquiiria, narta Pueyaso pueyano na camarnu quiniuucua. Nojuaja cuaara seetanujua-  
 naa maninia poonijioora nera, na niishishacari na camarnucujaari narta panishano Pueyaso pueyano.

#### **Cante seetanujuaanaa shuquiriaatia quijiacani**

Timoteonaa, nio cua sequesano quia niishitiojore pueya. Nojori quia shiniujiu-  
 ri na tojtianurajuahuaj. <sup>3</sup>Tamonu jaara tamaatia niishitiojori quia cua niishitiojo-  
 sanonijini, nojuajaari tojetaarucuaajanaa moseeca. Pa Jiyaniijia Jesucristo rupaari jiyanhua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. <sup>4</sup>Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocujahuaj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juaajiacara jataquiaa, nojoritia

juayonuujutajaca shocotanuucua nojori. Nojoriiri juhuacatecara ruutaquetoquiaa na juayonuutanura. Sesacatoquiaa-  
 rihuaj. Naajuahuaj, nojoriiri najuhuaana soquequiaa, narta Pueyaso pueya naasocua sesa miiquiaa. <sup>5</sup>Nojoriiri juayonuujutanu tarinitiaaquiijaca. Nojoriiri maja na naata maninia niishirio-  
 jonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitiajacara quiniu paniya, nojori jiyanishacari nojoriiri naacuaji jiyanhua casamiriacara quiniutianiya. <sup>6</sup>Taaquiriirini, Pueyasoo-  
 cua tiuujia pa quishacari, paacuaaquiniatejaj seetanujuaanaa juhua queraatia casamiriaca quijiacani. Paacua-  
 jaari shuquiriaatia quijiaca Pueyaso rupaacua tiuujia pa quishacarini, juhuajaniya quijiaca pa quishacarijuhuaj pa jiitiasano casaaniyojuata. <sup>7</sup>Paacujaari juhua sunucua roosaquiaari mijiriani. Naajuahuaj, paari juhua sunucua tacateri-  
 quianohuani. <sup>8</sup>Naaratej, paa jaara pa miaquesocoriquiano jiitariquiani, paa jaara pa cushishocoriquiano jiitariquia-  
 juhuaj, saa cunotaja shuquiriaatia pa quirij. <sup>9</sup>Saniniuujia, noo pojori, jiyanhua casamiriaca quiniuucua jiaatiajacatej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiciua nojori jiaatiasacari, sesa casaacuanio. Puetunu cuno sesa casaaja-  
 naari pueya sesoquiaa, nojori saniitiosaanura taraatia. <sup>10</sup>Cumanee-  
 cua jiaatianu jiyanhuanu, cuniquiji supuejaari puetunu sesa casaa pa miiniurajanaa. Naacuajitij, noojiaqueya parta Pueyaso pueyajinijioori Pueyaso rupaa tojinu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatiajaca nojori quishacaritij. Naaratej Timoteonaa,

majaari cumaneecaacua jiaatiaja quia quiniu.

**Pablo shiniujiushacari Timoteo, Pueyaso tojjia na quiniuria pueyaracaanu**

<sup>11</sup>Quiajaniya Timoteonaa, quiaacuaajaa-ri Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia mijia quia quiri, juhua pa Jiyaniijiaja. Pueyasooqua tiuujia quia quiri socua. Socua panijia quia quirijiu-huaj. Puetunu casaajanaa rejeretaja quia quirijiuhuaj. Jacaria pocuaja quia quirijiuhuaj, maja pueya rerequeteja. <sup>12</sup>Pa paraca nujuataja quia quiriquia, jijanohua quia tiuuniutia Pueyaso rupaacua. Pueyasocuaajaari quia saquirio-joquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niquitiojonu panishano quiajaniya jaaretenu. <sup>13</sup>Quiaacuaajaari niishiya taa Jesucristo seetanjuanaa pohuataquiaari Poncio Pilato niquiara-cuajani, nojuajaari seetanjuanaa Pueyaso Niyanu. Naajaa, nojuajaari niishiquiaari nojuajaari cunora mosaanu-taniya. Na Que Pueyasocuaajaari na samitiani quiaariuhua. Pueyasocuaajaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhua. Cua tojiri. <sup>14</sup>Puetunu cua rootasano quiajaniyajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniya-cuajani, na tojjia quia quiri pueyaracaanu, pa Jiyaniijia Jesucristo cuaara tiuquiriohuajaatijia, Jiyaniijiajanaa na quiniuria. <sup>15</sup>Na Que Pueyasoori na

tiuquitiniutianiya na panishacari, taa na sequequiaaricuaajani. Pueyasocuaajaari jijanohua pa timitiasano, saaja maninia na quiniuucua. Nojuajanaari Jiyaniijia. Nojuajaari puetunu tamasa jiyaniijia-nucuaajanaa Jiyaniijia. Nojuajaari camarucujiniji Camarnujuanaa cutara. <sup>16</sup>Saaja nojuajaari pueyaracaanu quijiaju-huanajaj. Majaari na supueni quiquiaari. Majaari na shaajenu quiniutianiyajuhua. Nojuajaari jijanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. iNojuaja cuaara pueyaracaanu timitiasaa-ria! iNojuajaari namitia na cumaaca jiitianajuhuanajaj! Cuaara naa quiriara pueyaracaanutej.

<sup>17</sup>Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuaara niishiiria maja pueya shocotejaca nojori quiniuria, casamiriaca nojori quiniuucua. Nojori cuaara niishiiriajuhuaj, maja na casamii-cua nojori tiuuniuria, nojori jijanishacari nojoriiri pueyaracaanu shuquiriaatia quijiaa quiniutianiya casamiriaca nojori quiniuucua. Pa jiitiasano casamiiri shaajeriquiano. Nojori cuaara Pueyasoo-cua tiuuria cutara. Nojuajaari capora cutara, na niquitionura puetunu pa panishano casaajanaa, shuquiriaatia pa quiniuria. <sup>18</sup>Cunora, nojori quia niishitio-jore, pueyaracaanu maninia mijiaa nojori quiniuria. Naatej, taa queraatia casamiriacatucuaa nojorini, maninia nojori miishano cuaara naa queraatia quiriiajuhuaj. Nojori cuaara ritia niquitio-jojuaca quiriara nojori jiitiasanojiniji, narta Pueyaso pueyano jiitiaaquishacari na panishano. <sup>19</sup>Naa capora nojori quishacaritij, nojoriiri juhua tari jiyocua-caanu racataa nojori casaa. Naacuajitij,

nojoriiri seetanujuanaa shuquiriaatia  
quijiaca quiniutianiya pueyaracaanu,  
mijiria, jiyocuacaanunio.

**Pablo rootasano Timoteo,  
naajionu na tucuatasaari**

<sup>20</sup>Timoteonaa, Pueyasocujaari quia  
jiyatequiaari na rupaajiniji pohuatana  
quia quiniuria. Maninia quia cojuare  
seetanu Pueyaso rupaajanaa. Majaari  
najuhuana tama pueya niishitiojosano-

juaaja tojijia quia quiniu. Noo  
niishishanojuhuaj, pueya sequesano:  
“Seetanu niishijiajanaa niishishano  
cutaratej”, majaari cuno tojiniu. Cuno  
niishishanoori seetanu niishishanojuanaa  
paraca, najuhuanaari. <sup>21</sup>Noojiaqueya  
parta Pueyaso pueyari Pueyaso rupaa  
tojiniu tarinitiacanu tari, cuno najuhuana  
niishishanoocua nojori tiuuniucua.  
Niojuanaa Timoteonaa.

Pa Jiyaniijia cuaara quia cumaquiiria.